

書叢本基學國

案學元宋

(四)

著義宗黃

行發館書印務商

宋元學案

卷七十二

二江諸儒學案表

宇文紹節	程公說
程公頌	程公頌
程公許	程公許
陳概	
附兄栗	
楊知章	子 子謨
李修己	子 義山 彭汝
張仕佺	
范仲黼	蘇在鎔
張鈞	

	師遇
范子長 ——	高載
范子諤	
	魏了翁 別爲鶴山學案
	范氏所傳
	范大治
	范氏續傳
范蓀	
朱德之 ——	高崇 別見鶴山學案
並南軒門人 五峯劉氏王	
氏紫巖再傳 龜山和靖譙	
三傳 氏武夷得全	
二程元城子 文四傳	
虞剛簡 ——	從子 玠別見鶴山學案

曾孫汲別見草廬學案

程遇孫

附兄壬孫

薛紱

鄧諫從

張方

並南軒私淑

黃裳

楊泰之

平甫講友

父虞仲

二江諸儒學案

祖望謹案宣公居長沙之二水而蜀中反疏然自宇文挺臣范文叔陳平甫傳之入蜀二江之講舍不下長沙黃兼山楊浩齋程滄洲砥柱岷峩蜀學之盛終出於宣公之緒述二江諸儒學案梓材案蜀中之爲張學者謝山盡入是卷其有本非蜀人而相與講學蜀中者亦附焉

南軒門人胡劉再傳

忠惠宇文顧齋先生紹節

宇文紹節字挺臣成都人祖虛中簽書樞密院事父師瑗顯謨閣待制父子皆以使北死無子孝宗愍之命先生以族子爲之後補官仕州縣既第進士累遷寶謨閣待制知廬州時韓侂冑方議用兵先生至郡議修築古城創造砦柵專爲固圉計淮西運判鄧友龍譖於侂冑謂先生但爲城守徒耗財力無益於事侂冑以書讓之先生復書謂公有復讎之志而無復讎之略有開邊之害而無開邊之利侂冑得書不樂乃以李爽代之召爲兵部侍郎兼中書舍人直學士院以寶文閣待制知鎮江府吳曦據蜀趣先生赴闕任以西討之事先生至謂大臣曰今進攻則瞿唐一關彼必固守若駐軍荆南徒損威望聞隨軍轉運安丙者素懷忠義若授以密旨必能討賊成功大臣用其言遣丙所親以帛書達上意丙卒誅曦權兵部尙書未幾除華文閣學士湖北江西宣撫使知江陵府統制官高悅在戍所肆爲殺掠遠近苦之先生召賓帳前收其部曲俄有訴悅縱所部爲寇者先生杖殺之兵民皆歎陞寶文閣學士試吏部尙書尋除端明殿學士簽書樞密院事安丙宣撫四川或言丙有異志語聞廷臣欲易丙先生曰方誅曦初安丙一搖足全蜀非國家有顧不以此時爲利今乃有他邪吾願以百口保丙丙卒不易朝廷於蜀事多所咨訪先生審而後言皆周悉事情嘉定六年正月甲午卒訃聞上嗟悼爲改日朝享進資政殿學士致仕又贈七官爲少師非常典也諡曰忠惠參史傳

進士陳平甫先生槩附兄栗

陳槩字平甫普城人也乾道進士對策慷慨魏良齋讀而奇之告以君鄉有張敬夫者醇儒也先生遂以書問學與兄栗同刻志於聖賢之道予讀南軒集答平甫書及所作潔白堂記蓋友朋之列其時蜀士除

宇文樞密外。尙未有從甫軒遊者。平甫請益最先。自是范文叔范季才始負笈從之。則皆平甫倡導之功也。而宋史竟以平甫爲南軒門人。或者請益既久。遂執弟子之禮乎。平甫之官爵無從考見。而兼山黃氏之源流實由此出。淳熙嘉定而後。蜀士宵續燈雨。聚筮以從事於南軒之書。湖湘間反不如也。然則平甫之功大矣。平甫嘗言於南軒。欲自漢唐以來諸儒之嘉言懿行。萃爲一編。以明道統。又欲訪周程張子之後人而周卹之。惜其著述之無所傳也。修

楊雲山先生知章

楊知章。潼川人。號雲山老人。累舉不仕。而得張宣公之學於廣漢歸。而喜以授其子。曰。欲造聖門。當從此入。造深養熟。內外合一。治己治人之道。備於此矣。

知州李先生修己

李修己。字思永。豐城人也。乾道進士。參與國軍事。陸復齋爲教授。盡告以躬行之說。謂當息其已學。求所未學。遂知聖賢源流。已而得見朱子。學益進。先生故與彭止堂爲同年相善。因介紹之。從南軒遊。兩令寧鄉衡陽。皆有聲。當路多薦之。將召以哭趙忠定公忤宰相。通判成都府。二江范且舟者。南軒高弟也。方聚同志講學。先生與上下其議論。時蜀中後進盛從事於南軒之教。而先生與延平張仕侏子真參焉。尋知成州。韓侂冑聞其名。使人諷其附己。先生笑而不答。竟不得召。先生居官。一介不取。而友愛任卹。不計有無。故歿無私蓄。有李成州集十卷。子義山。

通判張先生仕侏

張仕佺字子真延平人南軒高弟

雲濠謹案朱子爲先生父左司維墓志云公字振綱一字仲欽劍浦人紹興八年進士官至左司郎中屢與權幸忤致仕卒子士佺通判融州從張敬夫宦學有聞驗其操執器能信其有似公者據此則先生之學問淵源可考矣

知州范月舟先生仲黼

范仲黼字文叔成都人正獻公祖禹之後也仕至通直郎爲國子博士兼皇姪許國公府教授初南軒雖蜀產而居湖湘其學未甚通於蜀先生始從南軒學杜門十年不汲汲於進取鶴山謂其剖析精微羅絡隱遁直接五峰之傳晦翁東萊皆推敬之後以著作郎知彭州學者稱爲月舟先生晚年講學二江之上南軒之教遂大行於蜀中其時二江有九先生之目謂范蓀范子長范子該與先生皆成都人薛紱鄧諫從皆漢嘉人虞剛簡程遇孫仁壽人宋德之唐安人或亦有未及事南軒者皆從先生私淑得之而南昌李修己延平張仕佺亦同講習其間修

梓材謹案此傳與陳先生平甫傳梨洲原本在南軒學案自謝山修改以入是卷

知州范雙流先生子長

范先生子該合傳

范子長字少才成都人也二江先生從子與其弟子該字少約同遊南軒之門以進士官太學有要人慕而候之先生避焉鶴山魏文靖公嘗序其事所云閉干木之門或謂迫斯可見卻陽貨之餽乃復拜以其

亡是也。嘉泰末，北闕門鴟尾及省部相次災。先是赤眚爲沴，太陰犯權星，天子避殿求言。先生與李仲衍、趙全道、魏鶴山皆上疏極陳韓侂冑之惡，以爲爵及興隸，權移主上，請退之。侂冑大怒，諸公相繼罷官。吳曦告變，上頗思諸正人言，有詔召蜀中三人。時侂冑尙未死，先生與鶴山皆謝不赴。惟李季允至，已而更化。又召蜀中三人，先生亦與鶴山豫焉。史彌遠忌之，先生至京，不得入對，以吏部郎知瀘州。瀘爲夷境，會長楊榮請開白錦堡爲錦州前帥許奕持之，未得寢而奕去。先生力言其不可，乃置平泉寨以鎮之。夷人不敢妄動。瀘以大治，然卒不得入朝，以殿撰知崇寧。鶴山之初志學也，由先生兄弟及薛符溪以得門戶，及入中原，始友李敬子輔潛庵。今語學派者，莫知淵源所自出，而蜀中之爲南軒高弟者，皆泯然無傳，文獻不足，可勝歎哉！少約與陳同甫善。

知州范華陽先生蓀

范蓀，字秀才，成都人也。乾淳以後，南軒之學盛於蜀中，范文叔爲之魁，而范少才少約與先生並稱嫡傳。時人謂之四范。仁壽虞提刑剛簡嘗請先生講學滄江書院。鶴山魏文靖公初爲考索記問之學，先生以歛華就實語之。故鶴山之稱先生有曰：「學本誠一，論不籋條，自浩氣養心以求道腴，不苟剛吐柔而求聲利了翁敢不勉希前輩益勵後圖，或可代諸老先生之對，庶不貽吾黨小子之羞者也。」太府李繫薦士於朝，曰：「黃公裳、李公舜臣與先生由太府寺簿晉大理寺丞，累官宗正寺丞，知邛州。」

知州宋彭山先生德之

宋德之，字正仲，唐安人也。慶元二年，外省第一，爲山南道掌書記，召除國子正，遷武學博士，與諸生論八

陳本乎八卦。皆動物也。奇正之變。往來而不窮。知此然後可以致勝。遷樞密院編修。嘉泰末。平原已有開邊之說。而外人未之知也。會赤眚見。太陰犯權星。未浹旬而北門鴟尾災。延及省部。天子下詔求言於士。多指平原之橫。以及時政諸弊而已。先生謂離爲火。爲日。爲甲冑。坎爲水。爲月。爲盜。爲隱伏。故火失其性。赤氣見。濫炎起。則憂在戎兵之事。水失其性。太陰失度犯權。則憂在隱伏之盜。因陳七事。且曰。人火小變。不足慮。天象變。臣竊危之。是歲。沿邊帥守始盡用武臣。吳曦既久在蜀。皇甫斌在襄陽。郭倪李爽在兩淮。先生又進言。敵未動而輕變。祖宗之舊制。命武臣帥邊。以自貽患。晉叛將唐藩鎮之禍。將起。又言。蜀帥權重。宜及今防微。侂冑惡之。先生請外。有留之者。遷太常丞。次年。出知閬州。吳曦變作。託傷足以避事。職誅。始赴閬。而楊后用事。侂冑殛。邊事大壞。無不如先生之言者。擢本路提刑。安沂公丙素有不快於先生。以不俟代者至。輒用觀察使印泄事。劾先生傲視君命。詔降一官。歷湖南湖北提刑。入爲兵部郎。時中朝頗疑沂公。史彌遠以問先生。對曰。蜀無安丙。朝廷已無蜀。夫人有大功。不敢以私嫌毀之。執政不悅。未幾。罷官。沂公歎曰。嗟乎。丙不知正仲。正仲知丙。丙負正仲。正仲不負丙。乃遣人請昏。先生謝之。論者益服其公。已而起知眉州。卒。先生學於南軒之門。少與范文叔輩講道。故其風節凜然。而所養極粹。惜乎未竟其用云。

南軒私淑

提刑虞滄江先生剛簡

虞剛簡字仲易。一字子韶。仁壽人。忠肅公允文孫也。爲趙文定公雄壻。文定子昱。志士也。好讀周程張邵。

呂謝楊尹之書。先生因知學統所在。潛心體認。以郊恩任官。再舉禮部。歷任知華陽縣。二江范教授仲黼者。南軒先生高弟也。方會文講學。以明湖湘之緒。先生因是得和齊斟酌。盡聞胡文定公父子以至南軒所討論於嶽麓者。而致精焉。喟然歎曰。洙泗之學。堯舜以來之學也。伊洛之學。洙泗之學也。而乃以爲一家之言乎。凡再知永康軍。招諸生講學。境爲大治。以安撫使黃疇若薦。召赴都堂。不果。奉祠未幾。起用。未上。遭劾罷。嘉定十一年。詔知簡州。金人犯邊。制置使董居誼辟爲參議官。先生經濟之略。得之家傳。至是固辭不行。或曰。將王事何。先生黽勉從之。請收人才。厚軍餉。以結士心。抽還忠義人之配內郡者。以紓邊人之憤。又請緩科三路饑夫之直。皆得施行。大散關陷。東路帥李貴遷去。天水一帶皆被兵。西路帥莫肯行。先生慨然請往。次魚關。遂自移金平。督師前進。人心恂恂。先生謂曰。我師旣出。敵必不能越大安。已而大安果以勦敵聞。會居誼召還。先生亦抵簡。利州潰卒作亂。由果閬以趨簡。大書其幟曰。破簡入西川。時先生至任甫五日。驚奔相屬。閣學劉文節公方家居。貽書相約效死。先生阻江固守。賊知有備。去之。而張威歸軍過城下。賑其匱乏。軍士大喜。劉文節上言。剛簡保守一城。遮蔽西川。遂有夔州提刑之命。兼提舉常平。俄改利州。先生召軍帥劉昌祖謀曰。必復阜郊湫池。然後敵氣可奪。雖圖秦鞏可也。昌祖曰。諾。遣人焚湫池之糧。遂復之。先生曰。未也。時樞府慮生事。每以越境爲戒。昌祖猶豫不敢行。先生督之如南谷。遣其親將進屯阜郊。于是階鳳成和之民。皆荷戈赴之。得兵三十萬。軍聲動天地。內薄乘障。斃其大將郭贊。敵之壻也。先生得阜郊之捷。正欲擣秦州。有以密劄勒昌祖還者。忠義人大憤。散而爲盜。阜郊復受兵。先生夜出撫定士民。復募軍擣鞏之青野原。以牽制之。敵師始退。於是先生請集保甲之民。以爲守禦。三年。

之間。圍集三十九萬二千餘人。自是閩蜀有備。又請修屯田之利。而墾田百餘萬。邊儲以足。魏文靖公除工部侍郎。舉以自代。不報。先生與制置使鄭損不相得。損小人也。先生乃上歸休之請。五上報可。既歸。而損竟誣劾先生罷祠。先生罷之三年。而損棄階成五州。先生猶貽書諸司。力言不可。其始終憂國如此。是年卒。所著有易傳論語解詩說尤致精者。易本邵子之學。參以周程諸書。及漢上朱氏說論。著十有六年。不以示人。卜居成都之合江。范季才鑿梓材案牘當作藝。卽華陽先生。謝山稿有華陽別傳。云滄江先生虞剛簡亦師事之。亦南軒高弟也。爲題曰滄江書院。學者稱爲滄江先生。長沙吳制使德天曰。湖中親炙胡張者多。而得其學如此者鮮矣。魏文靖公稱其學以爲由博致約。浩然獨得云。先生以故相之孫。著效危疆。顧未嘗得登朝一展其抱負。君子於是知宋之終於不競也。先生論學之大旨曰。乾之九二。龍德而正中。庸言之信。庸行之謹。閑邪存其誠。而坤之六二。言敬以直內。然則中庸誠敬。是乃天地自然之則。古今至實之理。帝王所以扶世之極。聖賢所以明德新民。未有不由之者。楊伯昌聞之歎服。張亨泉先生方亦同學易於滄江。

漕使程先生遇孫附兄壬孫

程遇孫字叔達。仁壽人也。累官太常寺丞。潼川漕使。少年雄於文。已而折節爲南軒之學。范文叔居二江。所謂九先生者。先生其一也。先生有兄壬孫。官至雅州簽判。亦躬行君子。與先生最友愛。及卒於官。貽書以玉環爲訣。先生每見玉環。則嗚咽流涕。其至性如此。

祕書薛符谿先生絨

通判鄧先生諫從合傳

薛紱字仲章龍游人也。於書無所不讀。嘗見朱子所注楚詞。於黃棘之柱策。以爲策杖黃塵荆棘之間。笑曰。楚王初盟秦於黃棘。再盟於武關。而被執。故原其禍始耳。其知黎州。州爲羣蠻所居。而能興起其民。築玉淵書院以講學。學者稱爲符谿先生。二江講學九子之一也。史彌遠旣死。鶴山魏文靖公嘗以後進禮上之。書曰。如執事者。在今寡儔。嘗欲一拜下風。因循不果。起家爲吏。益遠聲華。聖學不講。士棄其德性之知。以忱於見聞之陋。其酣身利祿者。固無足言也。稍知自好者。亦以纂詞緝句爲學問之極功。俗流世敗。莫知正救。乃至養疴枕席。臥制四海。舉朝薦紳之士。奔走後先。莫以爲非。今天去積年之疾。是治亂安危之幾也。或爲地節之親政。或爲天寶之踵亂。皆未可知也。而朝會無白首大儒。可備顧問。則天下事誠未可知也。某欲乞身以去。卒酬讀書之願。未知見日。臨紙悄然。鶴山又題其則堂詩云。卓哉符谿老。吾道資禦捍。萬殊錯標中。獨識一理貫。反躬事省察。憤世興寤歎。揭堂闡斯則。絕識陋秦漢。以進士由成都教授。召爲秘書郎。廷對極言韓侂冑之奸。坐劾去。所著有則書十卷。皆談易理。鶴山自以爲不及。同時有鄧諫從者。字元卿。亦漢嘉人。亦豫二江九子之一。嘗通判黎州。見於周益公集。不知其後官階所至。

提刑張亨泉先生方

張方字義立。資中人也。二江范氏滄江虞氏講明南軒之學。先生與焉。以慶元進士官簡州教授。爲諸生痛陳佛老之妄。使不惑於趨向。其於時學徇名失實。好高忘本之弊。尤痛切入膏肓。歷知邛州眉州果州。遷直祕閣。四川制置使參議官。充利夔成都路提刑。劾去墨吏數人。又開新渠。以殺三江之怒。疏條急務。

六事皆直陳時政之失。又疏言大本大剛大勢大務。聞者悚栗。改帥漢中。以兵復天漢武休虎頭之險。蠲錢三十萬緡。米二千斛。給田以卹死節之家。進尙書兵部郎。以母老乞歸養。用郊恩官其弟鶴山。魏文靖公極重之。學者稱爲亨泉先生。有亨泉稿一百卷。予讀鶴山祭先生文。則先生以母喪哀毀不起者。平甫講友。

忠文黃兼山先生裳

黃裳字文叔。普城人。少穎異。能屬文。第進士。調閬州新井尉。未赴。罹外艱。邑子從受業。先生語以經義。又爲之講解。其後學益詣。悉焚其稿。服闋。授巴州通江尉。三年。杜門潛究經傳。出入古今。默而精思。或達旦不寐。人與語若無聞。然於是剖微析幽。宏深四達。文譽日甚。總領趙公公說聞其名。俾諸子從之遊。光宗卽位。制帥留公正薦五士公爲之首。進對。謂中興規模與守城不同。因論大利害。凡數千言。上極異之。除大學博士。進祕書郎。遷嘉王府翊善。每勸講。必援古證今。嘗作八圖以獻。曰太極圖。曰三才正性。曰天文。曰地理。曰王霸學術。曰九流學術。曰帝王紹運。而終之以百官文武。每曰爲學之道。當體之於身。本之於心。總宜以心爲嚴師。於心有一毫不安者。皆所不可爲也。紹熙二年二月。雷雪交作。先生上封事。語特切。深擢起居舍人。未幾。瘡發於背。少瘥。卽奏人君納諫不可執以己私。因私心而生勝心。因勝心而生忿心。是以臺諫不得其職而去。上領之。先生見王向學日益。因作渾天儀輿地圖。勉以進學。如天之運行不息。居數月。除中書舍人。尋除給事中。進侍講。貴近一限以法。後值侍臣進用不當。繳論甚切。遷兵部侍郎。先生不受命。乞去。改除顯謨閣待制。仍爲翊善。太上見嘉王學問殊進。謂先生曰。此皆卿力也。先生曰。臣伎

止此。朱熹四十年學問。陛下宜收召。使備寮屬。且言蜀士楊輔。劉光祖相繼在選。可充學官。上嘉納焉。時上以憂疑成疾。不過重華宮。先生苦諫。及壽皇不豫。復抗聲切諫。隨以號泣。宮門閉。掩涕而出。自是先生瘡復作。連章請外。不報。乃移疾關外。聞壽皇遺詔。亟入臨。瘡遂大作。寧宗卽位。不能朝。再除給事中。改禮部尚書兼侍講。入謝。奏曰。孔子曰。有始有卒者。其惟聖人乎。詩曰。靡不有初。鮮克有終。所謂有始有卒者。由其持心之一也。反覆告誡。一主此意。蓋先生絕筆之作也。先生三歲病瘡。以國事積憂。遂至不起。年四十九。贈資政殿學士。謚忠文。先生爲人簡易端純。每講讀。隨事納忠。氣平而辭切。事該而理盡。與人言。傾盡底蘊。恥一書不讀。一物不知。所爲文明白條達。有王府講義及兼山集。雲濤案宋志稱兼山集四十卷。論天人之理。性命之源。皆足以發明伊洛之旨。嘗與其鄉人陳平甫兄弟講學。平甫南軒高弟也。師友淵源。蓋有自來云。參樓攻媿集。

雲濤謹案宋黃先生靈有二。一字冕仲。南平人。元豐五年進士第一。累官禮部尚書。所著有演山集六十卷。

字文門人胡劉三傳

教授程克齋先生公說

程公說字伯剛。眉山人。積學苦志。以春秋經傳。倣司馬遷書爲年表。世譜。歷法。天文。五行。地理。禮樂。征伐。官制。諸書。自周魯而下。及諸小國夷狄。皆彙次之。時有所論發明。成一家之學。卒年三十七。參直齋書錄解題。

謝山程氏春秋分記序曰。南軒先生講學湘中。蜀人多從之。而范文叔宇文正甫最著。眉人程克齋兄弟並遊於宇文之門。而克齋之學最醇。所著春秋分記九十卷。左氏始終三十六卷。通例二十卷。比事十卷。又纂輯諸儒說爲春秋精義。未成而卒。別有詩古文詞二十卷。語錄二卷。士訓一卷。程氏大宗譜十二卷。弗盡傳也。獨分記則其弟滄洲閣學上之祕府。行於世。克齋官邛州教授。方爲此書。未卒業。聞吳曦以蜀叛。毀車馬。棄衣冠。抱經逃歸。奉其父入山。時其次弟仲遜亦掌教益昌。誓不屈賊。而克齋悒悒尤甚。遂病。病中急就其所著。幸得成編而卒。年尙未四十也。

掌教程先生公碩

程公碩字仲遜。兄弟三人。皆以科第進。先生嘗掌教益昌。同上

龍學程滄洲先生公許

程公許字季興。一字希穎。克齋先生之弟。由進士積官至權刑部尙書。生平冲澹寡欲。人不得干以私。與故相史嵩之不合。鄭清之尤忌之。所建多格不行。其知袁州時。新周茂叔祠。葺南軒書院。聘宿儒胡安之爲諸生講說。及婺州召還。疏請復京學類申之法。以養士氣。清之喉言者劾之。出知隆興。未拜命而卒。贈龍圖閣學士。宣奉大夫。所著有塵缶集。雲濠案四庫書目。滄洲塵缶編十四卷。內外制奏議奉常擬謚。掖垣繳奏金革講義進故事行世。參史傳。

楊氏家學

秘閣楊浩齋先生子謨

楊子謨字伯昌。潼川人也。其父雲山老人得張宣公之學。以授先生。先生朝夕究圖。凝然一室。往往踰月不出戶。自是默識聖賢下學上達之序。動靜語默。不違乎誠。淳熙七年省試。胡文靖公晉臣得其文。以爲有格君氣象。列優等。入對。孝宗發策問之。曰。帝王躬行之道。莫大於學。學者政事之本也。欲極乎學之用。不可不求其要。何謂要行之以至誠。要之以不息。是也。大學之道。自正心誠意。以至於平天下。中庸之道。自尊賢。以至於來遠人。皆不外乎至誠之一言。臣不知陛下之躬行。誠與未與。試以天人之應。而卜陛下之誠。而知容有未至也。又曰。臣聞之道路。謂陛下左右近習之人。雖無顯然害治之迹。而諂諛欺矯。實繁有徒。故凡速於求售者。率造宦寺之門。珠玉錦繡。以充苞苴。絡繹於道。而陛下有所不知。此非細患也。孝宗嘉其直。擢置甲科第八。累官通判成都府。吏部侍郎李璧舉以自代。權發遣黎州。適有吳曦之亂。誓以死守。移書方請討賊。願以義勇爲前驅。無應之者。而曦所遣逆黨至成都。分遣其將至黎。先生以計遣之。使又至。先生與之文移。遷延以待其變。而曦已誅。以薦召入對。首論權臣誤國。叛將干紀。願鑒過往之已事。開維新之令圖。其二論皇太子旣正儲宮之統。宜使親正人授正學。王者之學。果何學也。大學之所謂正心。中庸之所謂謹獨。是也。惟輔導得人。而後有所受。其三乞招填黎州土軍。分番上寨。給緡糴粟。以備緩急。除吏部郎。因轉對。請於淮上荆襄關表。漢中空閒之地。招募軍民雜耕。以省運餉。節濫賜。捐內帑。以充糴緡。以收末楮。嚴責州郡實常平之儲。歸廣惠倉。以備凶歉。罷軍興一切科歛之法。復師旅饑荒之地。以紓民力。又曰。民之困苦極矣。易失者人心。難諶者天意。修人事以符天意。其要在養民。除軍器監。復兼侍左郎官。上言學術國家之壽脈。公論天下之元氣。所以扶持皇極。主張國是者。必歸諸此。更化以來。衆

正之路方啓而羣枉之門漸開。善類雖進而忠鯁之士有相繼引去者矣。姦黨雖斥而夤緣勢要有拂拭絅用者矣。君子小人猶薰蕕不可同器。今顧欲調停參用之。幾何不爲國家之禍。寧宗蹙額領首者久之。而小人側目矣。先生知不容請補外。除大理少卿。有坐僞告者。事連中官。先生移文內省索贓。小人忿恨。除直華文閣提刑成都。再兼知嘉定府。皆有善政。尋請老。進直徽猷閣奉祠。起知隆州。不赴。臥家十年。召赴行在。屯田郎度正貽書強起之力辭。詔晉祕閣修撰致仕。先生自奉祠講學於雲山書院。與諸生敷陳論孟學庸大義。平生不輕著述。欲使人精體實踐以造於得。其遺文有浩齋退稿四十卷。

李氏家學

中正李後林先生義山

李義山字伯高。豐城人。知成州。修己之子。嘉定十三年進士。授大宗正兼金部輪對。言爲善不可無疑心。去惡不可有悔心。并陳進善不能無疑者三。去惡不能無悔者三。由是罷出。知吉州。後以湖南提舉攝師漕。楚俗尙鬼。有妖覲譚法祖。假禍福惑人。先生曰。此張角孫恩之漸也。斬法祖。燬其祠。歷階至中正大夫。所著有後林遺稿。思過錄。參江西通志。

梓材謹案。萬姓通譜以先生爲嘉魚人。且言其師事朱仲晦張敬夫。儒林宗派因之以列於朱張之門。梨洲學案原本。亦存其名於南軒門人。考先生爲嘉定庚辰進士。魏鶴山誌其母蔣恭人墓。言先生逾冠擢乙科。當生於慶元間。而朱子卽卒於慶元庚申。南軒先生卒於淳熙庚子。其不及事朱張明矣。故爲易著於南軒再傳云。